

光緒山西通志

方外錄下

錄十一之一 山西通志弟百六十一

賜進士出身頭品頂戴兵部侍郎兼都察院右副都御史巡撫山西提督軍務臣張昉奉

旨監修

歷代金元

國朝

常天壽徐溝人方能言作詩云我有一卷經不用筆寫成展

開無一字晝夜放光明年甫四歲而逝

太原府

法數年十一從妙空大師十年聽金剛經得元旨嘗賜紫衣
天會六年住平陽天甯萬壽寺演說金剛晚年不出戶闕端
坐而逝

無名老人襄陵農家子姓陶母賈氏夢青衣童捧金盤獻果
如瓜半紅半黃言上仙賜汝無名果因娠十三月而生性沈
靜嘗隨丹陽馬祖師過關馬曰此非干汝事汝自修行去復

乞化七年讀太上西升經豁然有省謂同行曰我今還鄉去也前有韶州王氏請住菴我許往已而王氏果迎至菴卽湯沐整衣逝年八十有六雅喜著詩皆言仙家事

李大方字廣廷汾西人七歲入道能日記千言尋讀書趙城天甯院遂窮藏史之祕至於六經百氏之學亦皆淹通泰和七年詔提點中都太極宮事賜號體元大師被旨祈嗣設大醮不爲方士譏幻之語召對稱旨又召入宮訪道儀觀秀偉占對詳雅章宗特敬異之大安初以祈雨靈應賜雲錦羽衣仍佩金符加號通元大師貞祐南渡乃還居鄉邑自號北山退翁元光元年九月北兵至避地清涼山入深谷臥龜下怡然而逝大方天質冲遠從容雅道一時名士如党竹谿趙景山王黃華皆以道義締交胥萃公鎮平陽以歲旱請致禱車

轍未旋而湖雨霑足莘公爲作贊以百世清規稱之

僧墳雲臨汾劉氏子幼出家於洪洞之圓明寺號法雲歲饑爲父母輓車就食千里母亡廬墓旁三年號哭無時父沒亦然山之人謂之墳雲旌其孝也時主南陽靈山之報恩寺嘗冬夜講法雨雪成花著埤瓦大如杯盃狀文士爲賦詩道其事又山之東水泉不給用一日巖石間出一泉衆以爲純孝之報也正大中示疾而化年六十四

以上平陽府

袁從義字用之虞鄉人幼沈默不好爲童子劇及長儀觀秀偉年十九入道師事玉峯胡先生盡傳其學通經史百家旁及釋典而於易學蓋終身焉結茅中條山之王官谷爲藏雲道院因以藏雲自號禮部趙閑閑內翰李屏山贈以詩中朝名勝如史季宏王隆吉羅鳴道李欽止吉仲器馬元章王可

道許德臣元禮昆季皆就傳易道事母孝生平未嘗遠出母
年九十終於隱所祭葬如禮州里稱焉里中幼孤不能自存
者收養之躬自教督既長又爲之婚娶好醫術病者來以藥
請賴以全濟者甚衆兵後歲饑盡出餘粟以贍貧者或時出
鄉人爭延致之談經誦道言笑彌日凡道家祭醮章奏皆鄙
而不爲嘗獨行山間遇異人自稱衡嶽主者蕭正之謂於蓬
山仙注院見其名氏卻後當爲孝廉貞靜仙人代鄭雲叟爲
少室伯主司眞洞天言訖失所在正大甲申元兵再略蒲解
避亂山陽史華國家已而保聚被攻顧謂弟子吾往矣閉息
土室中怡然而逝所著易略釋列子章句莊子略解雲卷妙
選方傳於世

蒲州府

張可用潞城人隱於崆峒山谷之石室十有餘年得服氣鍊

神術虎豹屏跡石圻泉溜清涼味甘多汲不竭少汲不溢疾者飲之獲安鄉人後爲築觀大定三年賜額曰神祥

申仙自稱羊住潞城人幼聰慧從大禹山遇葛仙公授太陰鍊形術單衣跣足僵臥雪中鼻息雷鳴能預知水旱災祥天壽疾者乞藥隨坐中果蔬與之卽愈年八十三卒殯百日時已冬夜半候聞霹靂聲詰旦視其冢有隙徑寸啟棺視之惟餘隻履單衾棕扇而已明昌五年延川秦知常撰記

德崇禪師上黨潞人大定三年受具爲僧至方山謁才公大士許以傳法指期而別又參宗鄭汴深徹淵源嘗遊熊耳山吳谷卽太行古道也斷崖懸絕爲建橋梁見者稱神十九年築室大通寺門徒數千俄方山老約書到呼徒取筆書頌跌坐而化茶毗得舍利千粒建塔以藏鎮將完顏眞爲立石刻

像平陽毛應撰銘

以上澤安府

益公和尚法名志益初剃度於柏山後得法蒙山雲和尚參頌曰跛躄癯羸鈍復癡口如鼻孔眼如眉自從一吸西江盡天上人間更不疑學士王庭筠子端聞居興雲和尚友因見益公益公歸晉過庭筠庭筠贈以詩承安元年居超山年七十有五貞祐二年坐化

僧惠寂俗姓王西河人蚤通佛書以父惟一子未出家父沒乃祝髮於孝義之壽聖寺年五十一矣崇慶中避兵南遷居鄂城素以華嚴爲業既客居徒衆解散獨處土室中不廢講說有問之者曰吾爲龍天說耳龕前叢竹旣枯而花隨采隨生人以爲道念堅固之感正大丙戌九月坐寂壽七十九

以上

汾州府

姬志真高平人號洞明子皇統中遊五岳歸語所親曰人生一夢耳捨宅作觀名清夢服紫衣爲道士見觀碑

姬志元高平人號崇道大師先住遼沁又嘗留宿五臺邑人築環堵居之積十五年觀成額曰明陽

二張仙者一名崇真澤州人一名道溫京兆人同居州西上町社之修真觀借遊海島得到長生密傳法印復歸結茅於此金末相繼坐蛻痊同穴後數十年人猶有見者

僧寶寂出家青蓮寺能文工詩與僧洪源同以善琴名郡守許安仁每稱其釋通儒理嘗爲僧惠湖作塔銘文字古潔洪源亦高僧俗姓陳談經冠一時修成化去

孫景元字仲遠沁水人爲靈虛觀道士以戒自持性高古博通經論學者從之所在雲集名動京師貞祐之變晦迹嵩洛

駕幸汴梁召爲上清儲祥宮開講大師趙秉文以詩敏諭之
乃應命非本志也三年不告而去崇慶壬申請陽城桑村岱
岳廟爲岱岳觀年八十四仙風道骨如閒雲野鶴出入古今
手不釋卷逸情遐想幾飄然與造物者游人莫能窺其趣也
以上澤
州府

圓滿西京大普恩寺僧天會中修建寺宇功行精勤江東朱
弁爲之記大同
府

閻真人名密沁源縣吏棄俗學道結菴於紫金山居二十餘
年戶解大定中賜額名其菴曰太清觀後延樓煩薛道紀居
之有道行

基公靈威院僧性濶達衣鉢外不留一物營造叢冢瘞尸四
萬五千有奇壽七旬餘卒大定癸未詔增廣伽藍特賜院額

曰靈威

以上沁州

善瑩和尚俗姓李平定人年十九依普甯教師求出家又四
年始受戒專靜志道愍言禪者誕而無常持律者嚴而太詳
滅裂抵牾不合於道於是徧游河北咨詢所得必錄與旨悉
取二家之異融而通之與道大適後學賴以不惑宋宣和中
木師歿嗣居普甯爲浮屠者宗天會四年應進義校尉李忠
等之請移住平潭壽聖寺泐其蕪廢遺化四出重新寺宇莊
嚴寶相鑄巨鐘市禾業旣而謝去與侍者智如復歸故山汾
陽軍節度副使高植爲謨文立碑謂師性純潔生而明悟事
佛謹恪持戒精苦善攝威儀恒修正覺遂其願智增長成就
世謂兼修爲幻三摩提者貞元三年示寂壽八十僧臘六十
有二瘞骨西原之壽塔弟子智傳等多有達者

平定州

懶牧和尚忻州人住興國寺戒行精嚴後僧從南方來彌獲
聞深密諦天德中書傷而遊茶毗得舍利建塔城西原有見
其杖錫相隨者云

慧英和尚號木巷居龍門山寶應寺有精行趙王欲見之英
先覺命徒曰當負我出山至金門寺回視則山崩矣其徒負
至端坐而寂

元嚴秀容人元好問次女也以女冠詔爲宮教號涪溪真隱
以上忻州蔣平仲山房隨筆元遺山北方文雄也其妹爲
女冠文而張平章當撰依娶之使人屬裕之辭以可否在
姝以爲可則張喜自往訪之規其所向至則方自手蒲天
花板輟而迎之張詢近日所作應聲答曰補天手段暫施張
不許養塵落畫堂寄語新來雙燕子移巢別處覓梁張
然而出凌延堪遣山年譜云先生之妹爲女冠無可考
次女嚴爲女冠而談耳

惠詮崞縣人出家五臺後住錫澤州琵琶寺造殿閣二十五

所度僧衆千餘人寫真經六百七十九萬字大定時示寂衆
爲建立塔幢

善慧崞縣翟氏子幼願出家父母強之娶三年無染始聽詣
清涼山依成覺爲師天德間賜號宣祕大師鑄印掌教臨終
謂弟子曰吾住山以來已事未純徒爲僧務累徇輕而遺重
其德虧矣爾曹勿踵吾陋跡言訖而逝

賣藥道人布袍草冠腋懸青囊落魄嗜酒繁峙義興鎮酒家
韓氏畜一雞以善鬥雄其鄉一日敵家以藥飼雞使不知痛
求與韓雞對久之下頷被傷垂死矣道人過其門曰我能活
之隨以雞置籠中摩捫良久取瓢水嗅之置瓢籠上而去成
怪其久不至竊視之則雞喙已復生矣道人竟不知所之元
德明爲賦仙雞行記其事

法沖大師五臺山僧大定三年黃冠蕭守真奏請與沙門角
力上許之召法沖入京止昊天寺明日集殿庭法力勝守真
世宗嘉歎賜儀仗送至五臺勅建萬巖寺居之

道士楊谷字洞微代州人隱居華山喜讀莊易道行卓絕明
昌間應詔隸天長觀嘗與知觀侯生食於市書火字於食案
謂侯昨過沃州聞君母病可速歸侯歸而母不病方疑其給
已及北還則天長已被焚矣又與客遊崧山見石蟬自泉間
出客曰蟬橫行殆天性乎洞微曰此未值正人故也以手指
之蟬卽正行晚卜居中而苦無泉時十月菴旁葵花榮茂
洞微曰於文葵從癸此水微也約同侶尋之見巽隅草際微
潤掘之果得泉然東隔絕澗汲引匪易復就石壁鑿窟嵌石
爲梁發泉成池自是中方得水甚易號楊公池

蘇陀室利中印度那蘭陀寺僧慕清涼文殊住處與弟子七人航海而來殞者三還者三惟蘇陀室利六載始達臺山時年八十五矣經一臺頂誦華嚴十部禪寂七日不息不食後化於靈鷲峰弟子佛陀闍毘收舍利八合持歸西土

楊氏女崞縣人幼字趙氏笄年績綫千百丈盡吞之一日理髮方半倏聞天樂趨出吐綫擲空中隨之飛舉至一村挽其髮抵五峰山瞑目而化邑人立廟祀之旱禱輒應元時勅封

金天聖母

以上代州

僧寶瑩河曲白氏子樞判華之弟也以詩筆見推文士間有

集行世

保德州

李寶安邑人冬夏披中衣寒暑不侵談笑遊塵市見者輒獲利人圖其像以爲利市神金大定二十年詔賜方外衣不受

朝退失履而去自燕至安邑二千餘里不二日還後化去有遺詩

王峭骸小字醜兒安邑人幼好道生平未嘗讀書亦無師授然能詩走筆如飛人皆異之述懷云天高三二指地厚一魚鱗東海一勺水西華一捻塵擺手乾坤窄睜眸日月昏擡頭天外視無我這般人閒居云閒閒林下山閒常袖手且開顏客不送迎交無往還飢食松柏子渴飲澗溪泉榻上坐邀明月窗前臥看青山落魄一身真是樂逍遙萬事不相關畫角云調高風緊正淒淒百尺樓頭帶月吹丹穴夜寒孤鳳叫碧潭秋靜老龍悲天涯客子初聞處塞上將軍乍聽時便是錢人生鐵膽定應聞此淚雙垂送友析居云一箇峰窩兒恰似半截藕本是同根生各自開戶牖澄都尚書趙周臣直中州

高士皆師事之

劉飲水安邑人居西紐延祥觀得神仙服水法口吐金蟬化

去有遺詩

以上解州

呂道章垣曲人金大定間爲縣吏夜夢神告以修養術寤卽避役居洪慶觀道成治疾有奇驗尋重修觀工訖解衲置黃河水面坐其上順流而去莫知所終

丁善淵垣曲人幼聰敏通經術年十六爲洪慶觀道士賜以紫衣通元號尋授法籙同禁厲鬼胥有顯應貞祐末紀邦瑞鎮守葛伯城性殘忍善淵諷諭全活者甚衆年五十八一日升几而坐召徒作歌歌竟飛昇其徒奉遺衣葬於觀北

以上解州

仙姑馬守明永和民家女母夜夢玉童駕鶴自空降於庭曰暫寄汝腹覺而有娠幼敏慧及笄不事女工日繁華非我志

也既而父母喪調甘泉女冠張妙清爲師居三載適絳州會
李氏越明年上元日無疾枕肱而逝三日復甦語人曰予暫
遊紫府會羣真耳自是不復穀食能前知吉凶疾者不假砭
藥呵禁頓愈歲旱蝗設壇密祝三日雨降蝗滅歲歉化導窟
室設食以賑後構菴於山林南社莊棲真養氣至至元戊寅
二月望日沐浴更衣大集徒衆留一絕云七朶金蓮數暫來
人世間闕功今補足紫府卻歸還落筆端坐而逝年六十有

四
州

郭元長趙城人生而聰慧七歲禮道士郭貞常爲師年十八
試居黃冠首禱雨獲應太和七年充提點太極宮授元淨大
師賜紫服圭璋自知終日壽七十有二里人立祠祀之

霍州

右金三十八人

又二人
附見

宋德方號披雲子隱居太原昊天觀列石洞七龕爲修鍊所
有石刻像自作贊今存至元七年贈元通披雲真人仍將雲
州金閣山雲溪觀賜號曰崇真鑄石陽曲之元通觀

杜志元陽曲人童稚嬉戲未嘗忤物甫冠遇一相者曰此子
仙風道骨塵俗汚染下手已迴志元悟遂禮代州神岡觀張
廣元爲師七年然有所得遍遊名山晚始歸里構西溪菴居
之知未來事爾如明鏡至元十五年按察使史杠撰記

李志朴字純甫質實勤幹建陽曲卿雲觀其徒張居敬嗣之
領悟師傳沈潛至道至元癸巳授天下元門演道大宗師掌
教真人

陶志願榆次人號隱真子幼從張真人學道授以修真鍊性
術遊燕與棲霞真人王公參究元妙有疑輒印證之歸棲邑

之萬春宮年九十羽化

洞明真人姓祁氏至元三十一年贈存神應化洞明真人鐫石陽曲元通觀

印寶榆次人俗姓康師妙聰禪師戒行甚高後住持汾州法興院坐逝三日茶毗烈焰中有金光獲舍利數千粒眼舌胷備有人見寶於黃檗嶺單騎西去云

大漢僧姓聶氏法名安身長九尺能誦呪驅邪通藏經中統三年召爲殿中將軍不拜命爲縣僧錄賜禪衣二卽號大衣禪師後圓寂有舍利紅光建塔於安定村寺禪衣遺貯龍山永甯寺庫

程志保字德全自號道眞子出於祁邱程氏時盤山樓雲大

柄白鬚都山疊石爲龍猛狀時引服龍下元帥單公築元真
觀以居之庚戌都道錄樊志應薦其名定宗賜金冠法衣升
額爲大元真萬壽宮中統加號沖虛清淨至德真人其嚮神
葆真之詣占卜推測之妙靈飛十二科品之祕心皆了然而
不掛口至元庚辰春三月九日付囑弟子劉志訓翌日黎明
湯沐易冠服枕肱而逝春秋七十有八王構爲之記

洪智號大愚元初延住太原奉聖寺梵行精深儒書外典靡
不覽法嗣希深一問淺浩昌杲惠喜等歷十有一傳胥克守

戒律而浩尤明棧嚴

以上太原府

煙霞真人汾西人隱姑射圓仙洞修鍊五十餘載癸丑端午
日忽辭眾曰吾當去矣言訖整衣坐化元大德間賜號真人
鄺希誠襄陵萬聖觀道士也生而骨古神異年十五入道初

金季道士劉德仁以苦節著五傳至希誠居燕天寶宮憲宗名其教曰真大道授希誠大元真人領教事內出冠服賜之仍給紫衣三十襲賜其從者至元五年世祖命其徒孫德福統轄諸路真大道錫銅章二十年改賜銀印劉廣撰碑記

張志清鄭希誠三傳弟子也制行堅峻東海珠牢山舊多虎志清往結茅菴居之虎皆避徙然頗爲人害志清曰吾奪其所也遂去後居臨汾地大震城郭廬舍摧壓獨志清所居裂爲二無少損焉乃遍巡木石間聽呻吟聲救活者甚衆朝廷重其名給驛致之志清舍傳徒步至京貴人達官來見率伏臥內不起道德播紳先生則納屣杖屨不少倦時人高其風圖畫相傳授演教大宗師凝神沖妙元應真人

皮裘先生洪洞人修真玉峰山中冬夏服一裘雪遊金陵巨

室有太湖石令墜於井後歸玉峰洵井得前石病者拔裘毛與之輒愈後不知所往

景素陽襄陵人師事梁古賓居阜山道院元季侍師不去兵至將殺古賓素陽曰師老矣願以身代兵卽回刃砍之刃忽折爲三兵皆羅拜而去

宏辨大師姓郝氏翼城金山寺僧幼敏慧日記三千言講說法要人服其精詣翰林學士承旨趙孟頫撰書道行碑

和楫曲沃人至元初住絳州寂照院戒律精嚴尤明陰陽術數學居嘗不出人或遇於里巷咸異之壽八十一終茶毘得舍利數百粒

雄辨大師洪洞人俗姓范名洪源至元間追報父母以孥爲鑑燃香干炷井涸跣跌其上水溢成河後至正定臥化得舍利

利百十餘粒今實際寺有像並見松菴老人石碣

以上平陽府

劉志淵字海南萬泉人生有異徵爲兒童不作嬉戲事親至孝嘗避兵緜山萬騎蹂踐獨不羅害遇長春真人受全真之學號元冲子年七十九吟詩一絕而逝今南李村遺迹尙存有大石號登仙臺

李純夫燕山人弱冠登進士不樂仕進棄官爲黃冠卜隱王官谷構了了菴於貽溪之上菴後建白雲洞自號孤雲子有秦無隅者純夫高弟子也無隅弟子有古村之關希哲太平之李道微皆以道行著純夫大德二年卒年五十八教諭賈履信爲之贊

舊志謂純夫唐時人元宗召之不起誤

薛元曦字元卿河東人徙貴溪年十二辭家入道龍虎山師張留孫與全節延祐間用薦召見侍祠制授大都崇真萬壽

宮提舉升提點上都崇真萬壽宮泰定元年扈從灤陽還至
龍虎臺喟然而歎卽日辭歸闕清甯齋見心亭熙明軒築瓊
林臺於龍虎山之西日與學仙者相伴其間而密修大洞迴
風混合之道至正三年制授宏文裕德崇仁真人佑聖觀住
持兼領杭州諸宮觀遺弟子攝其事五年卒年五十七自號
上清外史箸上清集樵者問會粹羣賢詩文爲瓊林集元卿
負才氣尤長於詩揭曼碩留瓊林月餘齋三日乃爲作序稱
其老勁深穩如霜松雪檜百折莫能撓清拔孤峻如豪鷹俊
鶻干呼不肯下蕭條閒遠如空山流泉深林孤芳自形自色
不與物競人以爲知言元卿工書人爭靳得之聞風者或使
圖其像以去

女冠王教山舊籍關中遇焦處士旋棄家攜子息學道遍遊

名山書服氣鍊形訣最後寓蒲甚久年大童黥髮丹顏無疾
奄逝有解弢傳行於世

蓋鐵驢萬泉人通遁術行步如飛倏忽數百里後尸解仙去
月公普救寺僧精於戒律宏教大師慧印嘗從之學回覺了

義

以上蒲
州府

神霄宮道人不知名元潞州守周幹臣宿觀中短檠膏盡道
人爲三吹光彌盛達旦不滅又嘗與修撰傅巖輔飲出樽酒
酌七十觥不竭及以水注之容不及半王嵩作酒聖鐙神記
今石刻存三忠祠壁間又明栗應麟李延馨延康幼同學觀
中有道人至謂栗貴不勝虧二李壽不勝貴問姓名不答留
題壁間曰鐵笛驚秋夜道人蹤迹孤餐霞歸碧落跨鶴入元
都海月丹陽路松風太乙鑪真同天地老若問姓名無後渠

李得如言

李子榮長子人遍遊名山後歸結廬日不再食臥不貼席究方外之學焉

吳志堅隸籍長子年十七至燕薊間禮清虛大師杜志明爲師長春真人嘉其服勤不怠錫以今名後歸鄉井邑人信奉之至元間誠明張真人命爲道正建通元觀

政忠屯留人俗姓周爲普明寺僧常入定浹旬不食頂上有光壽百歲雲遊至輝縣而化得舍利數枚五色圓瑩建浮圖夜常有光

淨公和尚俗姓李潞州人昭覺寺僧幼穎悟父授孝經至曾子避席卽整衿起父問之對曰聞師命尙如此況父命耶後應召作資戒大會賜紫衣遣還

道榮紫團山僧了悟能振宗風

正宗興教禪師潞州人幼名張德十二歲禮紫團僧道榮爲師精內典座下聽講者雲集晚悟禪理同大力士渡海莫知所終

慧沖有道行延祐中居平順清涼寺

子晏壺關人關天慶之子幼師慧沖精禪理後於鳳凰山建道場寺無水默祝巽巖甘泉湧湧入定出神同日遍赴諸會所衣履不殊詔賜袈裟紫緜玉環

江上人元演教寺僧世居長子南李村年十二詣寺雜度後構修真禪院遣徒汲水泉湧異物形如瓜烹而食之與其徒六人同化一石龕內土人稱初祖六祖焉

以上潞安府

于道淵授通元微妙靜照大師冀甯路平遙縣太平崇聖宮

住持本宗提點高道陟通義中和大師本宮提點趙道恒棲
遠常妙大師提舉見元國書碑

郝志松字善甫居太平興國觀元制贈能仁普濟沖虛真人
有碑姚學士樞撰文

張真一號丹華子元初修鍊汾陽西巖古洞後參邱祖錫號
歸建西巖菴丁亥五月有白鶴來止巖際久乃飛去後是日
至者復再真一羽化而洞有遺音因號鳴鶴古洞

清和真人邱長春弟子也居興國觀爲掌教大宗師賜號清
和真人亦自號清和子

梁志通介休人號達眩子元丙子間慕道西遊終秦之玉泉
觀或遇於長安灊橋與使客傳鑰封煙霞無爲真人

焦居士名豎介休人嗜浮屠之學登抱腹巖禮空王佛焚修

數十年髮元而頓體愈康健一日語寺僧當反天真端坐而逝時中統三年閏二十年至元丁亥起龕視之顏色如生

同光禪師號勝然子永甯州南山寺僧戒行卓越名震京都

具上卷
州府

秦志安字彥容道號通真子陵川人也父略以詩名家志安屢舉進士不第年四十遂致家事不問浪迹嵩少間河南破北歸遇披雲師於上黨執弟子禮事之喪亂之後圖籍散落遺藏書獨管州者僅存披雲欲鈹木宣布乃立局二十七而志安校書平陽元都觀以總之補完訂正多出其手道價重於一時居元都垂十年參元學受章句自遠方至者源源不絕道藏既成之五月為徒散言大緣已盡吾其行乎一夜天無陰翳忽震電烈風遽沐浴易衣蛻形於所居之椽櫟堂所

著有林泉集二十卷

珍講陵川人張姓出家禮崇寺洞曉禪機後枕右股而化

鄭堊嚴沁水人通天文歷數地理學隱厯山遇異人授左慈術臥冰雪不僵縣令遣召之強試其術乃索一瓶側身入擊碎之則了無所見已遁矣明洪武初識者遇於襄鄧山中疾行如飛云

馮前姑永平人幼慕棲真結屋高平西通義村日以鍊形爲事旁產香草飛鳥不期而集一日正襟逝邑立祠祀焉今董峰巷百石擲卽委蛻處

以上澤州府

印簡俗姓宋世業儒年十一祝髮佛書無所不通及王公問治民道必以儒術爲先後遊雲中住華嚴寺年五十六示寂茶毗日煙篋所至皆成舍利

張可學雲中人生於世祖初幼好道棄家業雲遊山水間年
幾百歲童顏不衰過交城止棲霞觀人呼爲石頭道人時值
重陽語衆人曰明年此日我乃與汝等別矣至期果尸解時
至正元年九月九日也

以上大同府

柳道士不知何許人相傳法甚高今郡城北三里許有真武
廟廟前有泉嘗出怪物傷人道士命童弟子撞劍泉側囑曰
吾下捉怪伸手取劍爾當與之遂入須臾見手出大如輪色
如靛童失聲棄劍而走道士竟不出怪亦隨滅今其泉爲草

灘

朔平府

薛道紀棲頰人居沁源太清觀驅孽龍息水患遠近禱者無
虛日壽百歲一日宴坐見松枝上山援來謁謂弟子曰此木
容報我歸期也端坐而化

甯武府

賈自希或作志希居榆社通元觀熟黃庭陰符二經明坎離
交媾水火既濟之法死後顏色如生觀中丹井猶存

州

唐善慶沁源人薛道紀之徒得師奧旨以救人爲事延祐二
年勅賜金襴紫服號和光大師

韓斗南沁源人初行陰陽術偶於石匣中得異書皆丹字習
之遂能驅役神鬼隱形變化縣令召而試之與一罈卽縮入
碎之無形呼之片片皆應人於他所見之後不知所終

以上沁州

郭罕然孟縣人寓平定州之娘子關至山中見一洞水流飛
瀑而下罕然入洞得異書遂善遁法或令入瓶呼之輒內應
碎之片片皆應人咸怪之

劉八郎孟縣人有道士授異書遂通遁術相傳至揚州歸飯
猶未熟云

普惠平定人號洞雲住壽聖寺能詩有戒行與中書左丞呂
思誠爲方外友呂嘗作洞雲歌贈之及呂北上惠貽詩曰君
王若問榆關郡地瘦民貧山水多後徙獅子山石巖下年九
十八坐化今名其地曰禪巖

以上平定州

王志常忻州人幼時牧牛田間遇異人挈之而行遽至天壇
之陽臺宮後八年來歸父母驚喜疑其死而復生遂度爲天
慶觀道士氣質渾厚信受道之器年近九十留頌而逝見元
好問天慶觀記

李之和元真觀道士博學工詩嘗與元遺山李牛臺廣和人
謂其有仙風道氣云

法空漢川人俗姓古出家遊忻州依懶牧和尚居萬安禪院
日誦寫華嚴經大德中微疾詢徒出須畢奄然而逝茶毘得

舍利十餘粒

了空忻州人姓王氏幼神異年二十遠遊後出家華蓋寺能前知嘗遇僧云修行當學最上乘前知特小乘法耳又數年遂大徹悟一夕作偈曰無物本來真身心何處尋人法雙亡御虛空現法身遂逝茶毘煙騰五色眾異之

以上忻州

正順蔚州高氏子依臺山壽甯用公薙髮旋受具足戒頂誦華嚴經行住不捨太后三詔不赴授五路總管堅辭不受成宗幸山特加禮遇臨終書偈坐脫收舍利無算建塔藏之信明字真寬五臺清涼曠高氏子依洪公披剃年十四入講肆二十四受大戒解孟蘭等鈔日誦大乘不少懈詔入殿廷賜坐應對稱旨授僧統從慶壽海雲和尚咨決心要年六十九坐化

文才字仲華隴西楊氏子博學能文續輯慧燈集釋賢首疏
擄室松下人稱松堂老人成宗特旨建寺臺山賜額大萬聖
祐國寺命主席嘗坐山三日忘歸弟子尋之始得大德六年
唱寂闍維得舍利百粒進呈勅建塔追封邾國公

慧印字宏教關西張氏子少業儒長業釋藏居太行之阿修
一相三昧七年根塵脫落皇慶元年詔至京講經於安國寺
賜紫衣香藥遣旌幢送至萬聖祐國寺至治二年英宗幸臺
山陪駕遊南臺獲嘉應賜幣及玉文殊像七寶念珠文宗命
住承天寺授一品銀印固辭至元三年示寂

唯德正定人俗姓孟經梵律論各探奧旨年二十至五臺遊
舍講就禪後卜居古公主寺終焉索紙筆書偈曰五十一歲
百拙一生不肯休歇清涼石虎報三更正是還源去時節

訖而遊

梁思問字辨疑，嶧縣朝元觀羽士也。敏慧通文，爲元門所宗，嘗與元好問遊。

彭舜安字國寶，嶧縣人世業醫，通儒書，自號西林翁。延齡羽化，葬於歷師坡下。越六月，里人程海南、李成遇之，二人不知其死，相揖而去，不知所之。

孫守眞，代州人，童卯入道，居鳳凰山，來儀觀。年八十，多識山中故事。元遺山嘗再宿觀中，撰遊記，多采其說，稱其居山五十年，不省有爲猛獸毒螫所傷害者。

王朴字淳甫，遼東廣甯人。貞祐初，以行省員外郎督餉至嶧，因家焉。乃創道館於州西北隅，扁其軒曰虛白，辟穀修真。一時士夫如元遺山、內翰李仁卿輩，皆造其廬，推重之。語見遺

山兩山行記因記其一絕云歲華空自老消息更誰知到此

輕感利功名自可遺

以上代州

何南卿字東夫博極羣書以理學自持值亂俘於北太宗丁酉歲設貢舉於平陽中選得免俘然絕意仕進往來汾晉從黃冠師宋披雲名爲志淵號清真子授以講衍之職披雲卒朝命提點永樂純陽宮賜紫衣號淵靖大師至大辛亥卜居芮城中條山水谷創樂全觀年九十一無疾卒著南華經註十三卷水谷代腹七卷

毛道眞夏縣人元至正間修養於瑤臺山旣卒門人立祠塑像祀焉後數年自河南募緣覓小車數輛載之抵夏縣渡河溼隻履託以具炊先行及挽車人至詢之則死已久矣一觀大驚視祠像隻履尙溼

以上解州

張志朴稷山人鍊形苦性衲衣露膝行丐汾晉間身不沾席者三十餘年一鉢之外餘無所奉城北創建洞神宮賜號真德大師至元十四年羽化

皇志祐稷山人年四十餘投龍翔觀梁先生受度閉關三年建九陽洞於馬橋村雲溪菴於下文村預知化期年七十有三端坐而逝卽葬菴內明初地震崖崩墓兒中塑一真人二仙卿侍立次四弟子相向坐有志銘

廣裕稷山人九歲從顯公和尚祝髮後二十年得法於雲素和尚通經律論藏蘄爲四眾宗世祖設資戒大會說法大內默契上心賜袈裟大德十一年示寂於金仙寺七日顏色如生樹塔以葬趙孟頫撰碑記

丁八行者稷山人初居甘泉佛密洞與守志同初大闢塑大

佛一尊高丈六尺名佛閣寺卽清涼院也

以上
絳州

普資俗姓李氏隰州人幼師事汾州僧淨閑廣通法論建崇

福寺趙德元記

隰州

姜善信趙城人禮運峰真人靳道元爲師隱居碧雲洞十年
塊坐一龕中統間世祖南伐駐師驛亭召善信問行師事特
陳仁義之舉後屢聘言事多中嘗過龍門修禹廟世祖詔問
禹所行之道引大禹謨以對又奏修堯廟年七十有八終夜
有青虹貫斗之祥追封靖應真人勅王榮撰道行碑霍州
志云師修謂龍門建禹廟平陽堯廟世祖召問賜號靜應
真人詳龍門御製碑記舊志以建堯廟追封爲順帝時誤
釋圓琛字仲寶山西人金末避亂留內黃善爲詩兼工書法
有以殘素請者隨手應之不厭結草廬城旁穿池引水種白
蓮其中自號蓮菴大德元年卒

右元七十三人又五人

楊魔頭太谷人出家資福寺散髮蓬頭似風顛洪武時晉恭王數召見有事叩門輒先知一日侍奕忽假寐既覺詰之應自平陽來看刈麥且得齋王哂曰何誕也卽出二麥穗四饅頭於袖中驗之平陽信然尋還晉陽莫知所終

板特達西域僧洪武初從晉恭王之國居普光寺能驅雷雨役鬼神勅封大國師圓寂獲舍利萬餘

昌海太原人俗姓許參徹半藏禪師與洪遵義金談道人稱海金蓮三高士早禱輒應隱岫山刺血書五大部經百十三卷校正華嚴合論五臺清涼傳本宗二百問胥楷書永樂中還赴京纂修大藏經一日更衣跌坐逝年八十有三義金太原人俗姓張禮了空爲師洪武間遊金陵受戒復歸

衍曹洞宗永樂壬辰詔赴京督校內典并三藏法賜衲衣禪
褥著勝嚴集校正水陸儀文六卷

洪蓮太原人俗姓吳早喪父事母孝母沒投晉城西饒益寺
僧智嚴出家戒行卓越於天龍洞刺血書五大部經文永樂
中詔選註大明三藏法數校大藏經典既成上進賜衣設宴
欲授以官懇辭還山

陸本雲間人宏治末居太原昊天觀石洞中有道術能符水
禱雨輒應袖核於山頂搖之雷聲輒隱起後遊華山莫知所
終

佛幻和尚住徐溝福興寺修寺缺材用衆方難之佛幻曰某
日某施主當至至期輒驗歸寂豫白於衆後十日披衣跏坐
逝

姚和尚住崇善寺林學使至寺異之問其姓名因出對曰風
吹羅漢姚和尚姚卽應曰雨打金剛林大人時稱其敏慧
海風和尚不知何許人萬歷中嘗攜一囊往來范村問行迹
詭怪人競呼爲海風子性嗜酒時入市酣飲醉輒發其囊出
破覩秃筆索紙疾書勢如風雨村人范朝尹聞而異之時新
葺圓智寺甫就卽延居其中書榜額就鳳揮灑不假營構而
章法天成見之嘆賞留數月他往廬以金笑曰我豈需此者
耶飄然去不知所之今所書鸞嶺道風毘廬真境尙存寺中
妙峰陽面僧戒行見重於世居郡中時以永祚寺舊塔微側
更建新塔今名雙塔寺又謀於汾水上建石橋事幾成被微
而去

培素和尚住徐溝北尹村觀音堂證禪諦嚴戒律如沙門上

乘

以上太
原府

定山和尚太平人俗姓彭名滿出家雲遊洪武十二年住盧溝橋三昧火焚而化

崔眞人名孟傳字朴菴襄陵人黃冠野服雲遊四方醫學得並公術萬歷時慈聖后疾篤應名醫召既至延入宮切脈投劑立愈賜號眞人後於武當羽化

圓鏡臨汾人嘗遊隰州妙樓山石室寺至北門瓦窰坂鑿洞構菴龕坐其中囑徒眾曰明日午時當歸次日沐浴焚香說偈而化

然燈和尚臨汾人名性平居五臺華嚴嶺獨坐誦經虎魅遁跡人甚奇之迎至堯王山中爲建天光寺神宗召入內殿賜千佛珍珠紫衣錫號然燈主皇壇講經拜國師年餘歸河

東延生菴以老焉

黃雲道士梁姓居臨汾之西冊村麻祠中終日整襟危生諷詠經卷崇禎二年尸解臨終語村人將爲靈神他日見西北黃雲起但呼梁道可免雹災後輒應村人祀之

以上平陽府

洪濟禪師猗氏靈巖寺僧有道行演通大小乘法遊金陵明太祖登極前風雨彌旬上不擇募有能止者洪濟應詔杖錫一呪卽便開朗上大悅爲印經一藏給傳以歸

房居士臨晉人嘗景園號睡松子少精書算主案牘被督唱然嘆曰人生如朝露何自苦辱如此遂棄家人中條山修道閉關十一年糧絕出山止宿虞鄉村扁鵲廟中夜有眞人口授先天眞訣遂往汾北麻衣山默坐二十一年移居平陽之姑射山洞虎狼皆馴伏旬日不炊爨巡撫于謙問休咎笑而

不答謂弟子曰無結果卒如其言人有訪者先知輒避去太
守胡睿甲之曰老農無所知也成化甲辰三月十五日沐浴
端坐書十勸文皆教人忠孝語習畢臥化先是洞中有石牀
二左右對峙唐時得道者臥化塑其尸於左至是塑居士尸
於右

楊攀桂及弟丹桂蒲州人好釋老家言偕隱終南山其子屢
饋扉屨遂入深山不出又數年鄉人有見於京都云

大陳小陳猗氏太清觀道士叔姪也得頗術常夏月碾麥戲
語人曰日烈甚宜入碾中避之遂入碾後寢神遊一日題詩
壁間止留空室莫知所往

宗禪師者嘉隆時棲隱於條麓保全村之調御洞四十餘年
村人言其飛錫之始已皓髮丹顏問其年不自記憶亦不傳

其姓氏里居人以其法號明宗疑爲宗室云派演曹洞不以
脩建殿像爲功檢閱大藏十三年談論經旨開誘道俗未幾
坐化容如生異香滿洞其徒道潤遷其龕於村西建塔其上
明曉蒲州僧戒行高潔揚襄毅公禮敬之遊緜上卓錫史村
淨土寺預知有兵革修寺牆完固隆慶初俺荅果入寇肆掠
縣境居民避入寺者凡千百人均保無虞

福登號妙峰七歲祝髮依蒲坂萬固寺卽和尚習瑜伽法初
不識經典苦行於中條讚歎寺閉關立禪三年尋見永明禪
師聽講楞嚴卽解悟無不通曉渡海謁普陀回住五臺山龍
翻石刺舌血書華嚴一部修建無遮道場神宗聞而嘉之賜
緇冠緝衲真來佛子之號移錫蘆芽造萬福錢塔鑿萬福石
洞峩嶠造銅殿二五臺一華山一俱莊嚴精妙太原建浮圖

於郡城左慈聖后佐以金錢塔成雙峙名曰宣文後歸臺山
坐逝遣中常侍賜祭葬

高錄倚氏人常於孤山採藥遇到海蟾授長生訣坐臥一土
室寒暑不出後村人欲發池忽出曰此萬古利也當爲若置
石授人一鞭入山驅石若飛石今存後卒妻子俱失所在

張仙崇禎間至蒲州主侍郎張廣多幻術士人欲遣妓亂之

須臾隱入壁中自是不知所往

以上蒲州府

癩僧宏治初知州馬毀淫祠郡北關有古剎繡流圖去僧等
曰勿去此榮靖家佛堂與國同休旣而沁源王奏留勅名
惠及王薨謚榮靖至閩將劉芳亮折四關寺亦毀言悉
嶽廟病僧未詳所來潞城民席名於正德中見其跡臥東嶽
廟不食惟飲水連數瓢名汲供之無少怠僧愈行名道之疾

若奔馬極力追不及也已息樹下名至授以辟穀輕身之術
力倍往昔與少年角無下之者又能飛擔走壁竟以盜死
鮑老年八十餘短髮不簪如雪嘉靖癸巳閉關五龍山三月
而髮黑者半期年如漆瀋府招之不來六月六日坐化
寂慧清涼寺僧不出戶二十年言休咎奇中先期示寂

明周號懶雲潞安人住持法住寺除夕詩爲謝茂秦所稱有
集行世

了白禪師又字石相黎城人萬厯間居大通寺通儒書善解
紫陽註疏

李如棠平順人垂髫時言未來事多驗三月初旬嘗與鄉人
羣處前閉目口清化麥早農今大熟人未信袖中出麥數穗
人皆異之卒之曰妻子號泣適有人自郡中來問爲誰哭人

以如棠死告人曰吾曾遇路中赤足西去及開棺視之無尸
骸止存雙履人遂稱爲李神仙云

秦某失其名平順人兄因其不務生業逐之騎牛至壺關神
頭嶺乞丐有夜窺者牛乃虎也後坐化於西村佛堂至今角
殿尙存臥像

張甲元黎城人少卽好道爲人牧羊沁水以鞭畫地爲圍羊
不得軼言事胥驗

李僊姑長甯人能修鍊終老繡山之巔生於元至正二年成
眞於洪武八年賜號純淑眞君

以上事
安府

閻雲俗姓溫介休人年二十祝髮興國寺後遊少室精修二
十年遂悟禪宗明洪武間應詔考選名僧置高等歸隱抱腹
巖復至興國講席一日謂眾世緣已畢說偈端坐而逝

范榮字子蘭介休人永樂甲午鄉薦官興國令相傳其罷官後遇仙人張三丰遺詩曰鐵笛風吹破曉煙相逢又在十年前曾將物外無爲事訴與毫端不盡傳白髮垂纓君已老青雲得路我爲先世間舊景只如此不如同歸一洞天縣人有遇榮於京師者將歸榮約終日飲後成祖物色三丰不得偵知與榮友因遣使至介休訪之縣人云見榮於京邸遂與偕往榮曰吾固知君之必復也相與傾倒頃之竟不知所往

壽谷俗姓張介休人祝髮吉祥寺福遊名山問元旨解悟於甘泉無相寺復歸慶成王聞其高行迎至郡城構蘭若居之朝夕周禪理一日辭歸寺趺坐而化

王元甯鄉人少貧負薪同樵者歌詠胥叶仙什娶妻未婚薄遊燕習吐納術既卒太監梁訪將殯之啟棺無迹人復見於

關西連雲棧中

韓教遠修真甯鄉沒狐觀常養鹿名仙童後與徒胥斃於盜鹿觸石亦斃數日人自平陽來者云見沒狐二道士引鹿南去

道人王綱居孝義姚村古廟終年不舉火嘗約人遊五臺其人不告而去至山下道人笑迎之已先至矣又送下山囑曰我所居屋勿爲風雨毀壞及其人歸道人乃立化古廟中計卽山下笑迎日也因立碑以誌異云

高神仙臨縣人少遇異人授木尺病者擊尺輒愈冬時浴冰河冰立解

孫浩遠字雲際自號樂陽子永甯州人得五雷天心正法神雨立應以符藥濟人疫癘多解後羽化

了覺俗姓張詣崑山從慧澄大師落髮徧遊名席探得元樞
後住汾天甯寺十有七年壽八十一枕股而寂

姜調變字理寰汾陽諸生好神仙術自號達元居士與縣人
武永清偕遊山左旅次取周易悟真討論之設爲問荅釋乾
坤二卦河洛二圖名曰元易晚歲遊遊不歸或云仙去天啓
中永清嘗刊其書

麻衣仙姑汾陽任氏女永樂初披麻衣隱石室山中家人求
之弗得後有見者遂逃入石洞聲隱隱如雷壁遂合手跡尙

存

以上汾州府

法亮姓崔氏澤州人出家靈巖寺刻修戒行嘗行腳至鍾山
造藏經歸禁足三年晝夜檢誦不輟作石塔藏之

祖湯陽城龍巖寺僧日誦經巖東小石龕辛亥六月六日方

誦法華忽一免徐入龕內蹲經案前誦已三揮不去自己至
申湯曰吾送汝歸路免從出門踴躍而去白所知爲作銘識

之以上澤州府

任榮大同人世業醫至榮益精尤好神仙術宏治元年年六十無疾卒踰年鄉人陳守過陳州見榮施藥市口大驚曰君無恙耶榮笑曰然固未死也嘉靖王長大同令黃世甯婦翁張某遇道人於伏牛山曰我大同任榮也公去某日當與孫會幸傳道之翼日張果晤其孫言盡符萬歷二年大丘張省祭抵湖廣艾御史所艾家人經武當山見草菴中道之兀坐謂之曰爲我告張省祭歸語任榮子孫榮俟宮殿畢歸也言畢忽不見凡三露蹤迹云已見藝術

覺同大同人俗姓康幼慧讀書過目不忘能文辭尤工

善善化寺讚數千言咸珍爲名翰時人讚曰續佛慧命湛然
清淨遐邇聞聲詩禪草聖

一齋大向地藏菴僧持戒律終日一室外別無所有施金帛
多不受受亦隨施貧者不留其餘或雨雪則累日不舉火苦
行三十年一日沐浴趺坐而化

任道一字真空萬歷間居大同南郭外東嶽廟廡下佯狂蓬
垢與人言喜怒笑罵初若不倫而後皆奇驗以故旗亭肆館
爭延致之至必醉飽歌呼以立亦有招之不就者詭異莫測
漸化預期大會跣足登坐若有待然良久日至矣乃送二朱
履至納履趺坐而逝

以上大同府

洪樹鏡州人幼愚鈍候穎悟諸品經義無不洞曉人呼聖僧
後住持香林寺禁步二年一日談經而化

子端榆社人蚤歲祝髮雲遊晚歸值時艱捐金建上下城敵樓以成保障人得義之

以上
遼州

呂雲仙沁州人成化間修真元妙觀善黃白術觀中係習點金飾之徒張道元索其術不授會雲仙入山道元力索之卒不授以死道元返荷鋪往瘞至則尸無存矣

王威沁州人習苦行子處花山嶺晨夕焚誦人莫知其道術嘉靖戊寅忽示衆化期里社始驚異如期雲集威辭衆入巖結趺坐須臾白氣上冲神遂往數日如生里人就眞身遺飾之後知州俞汝爲扣其遺蛻硜硜有金玉聲撰王仙傳海貴武鄉人柏林寺僧性純樸篤志焚修供水陸者五於歲經者二襲師衣鉢積貯頗豐悉捐之萬曆十四年正月命其徒持佛號曰吾將去矣危坐而化

以上
沁州

劉偉朝邑人正德間由舉人授文水令擢監察御史出守兗州府得仙術尸解相傳隱平定山中爲人推命奇中平定甄給事成德李知府愈爲諸生時從之遊初會城陳中丞琳嘗與同臺巡按兗州親弔其喪及家居識諸市疑其仙也呼與飲酒話舊意殊漠然旋賣藥於代州病者求藥隨以丸應無不立瘳多髯羣呼爲劉髯子後不知所終

讓大師號衲空一號罕峰相傳爲陝右人筮仕長吏後棄官雲遊得佛法於五臺山達觀禪師遂棲獅子窟與愁山海印妙峰輩五十三人爲淨友達觀示寂乃卓錫方山之昭化院戒行精嚴工吟詠晉潘二藩雅敬之萬厯中賜爲紫衣大師嘗貯粟於掌鳥雀馴集掌上就食後無疾跏趺而化

楊廷福壽陽人隆慶間生於遼州東漢山之白雲洞精心修

鍊施呪濟病甚驗後至聖泉寺預知歸期端坐而逝其徒就
原身塑像寺中

淨業號休糧和尚萬曆末修真孟縣之三聖寺功行圓滿或
贈偈云法身已滿三千界絕粟何妨四十年卻被河東獅子
吼箭鋒驚破小乘禪

淨大師號道圓卓錫風溝之關廟頻夢聖帝一日謂弟子曰
三日後亟備衾具至期沐浴坐化

孔道士自言宣聖五十餘代孫寓平定有年冬夏衣破葛好
飲酒謔浪語多中人隱人不能測羣兒從之戲必買餅啖之
摩挲裏中往往得金少許試噓鋼鐵皆成金人以爲能點金
術遇叢棘赤身偃曝其上不爲異未幾卒或曰死後有見之
者白雲深贈詩曰赤脚仙人破布袍不通姓氏自靈豪盧敖

去住丹梯遠丁令歸期華表高海上幾年乘竹杖人間終日醉松醪乾坤我亦疎狂客風月江湖共爾挑

普遼平定壽聖寺僧遊京師寓愍忠寺方丈說法名聞於朝莊烈帝召對封紫衣士子大和尚並賜衣鉢與兵憲惠世瑞廷尉張三謨結方外交

董元平定人東宮近侍尙膳監太監甲申後祝髮爲僧住持黑沙嶺觀音寺崇基立刹建橋修路年九十有三示寂當流寇擾攘時嘗假當道兵符逐賊全城安堵州人德之

以上平定州

冷謙字敬敬洪武初爲協律郎郊廟樂章皆其所撰有友酷貧誰盡門於壁令其入恣取金帛既出而遺其引後庫內失金守吏持姓名迹捕并執謙謙渴求飲以瓶水與之謙躍入瓶中拘者惶急謙曰無害第持瓶御前上呼謙瓶中輒應碎

之片片皆應後謙騎帶至定襄往來城市人呼爲羊皮氏
僧道明披剃金河寺嘉靖間雲游至忻州令狐莊嶽廟傾頽
僧發願重修人未信也僧自斫其手置盤中走募四方感動
一時自郡王及官吏士民咸願捐資遂大修殿宇工畢竟去
留其手懸於梁里人薛河東有文紀其事

惠海和尚忻州人俗姓董母石氏奉佛甚虔惠海生時母夢
老衲遺一大珠寤而生見光猶滿室襁褓中見人輒作稽首
狀稍長聞鏡鼓聲則喜十餘齡時爲聘妻不願求出家披剃
於本村洪福寺後值大旱村人祈禱罔應惠海持水魚誦呪
卽得大雨村有邪崇延治之亦絕縑流謁五臺者聞名而來
日益眾餽粥不給兄弟憐其貧分父產與之得地十餘畝銀
千兩於是起蘭若宿僧眾聞是舉多樂助之工成惟日誦

經卷年六十餘召弟子語曰聞鐘聲勿他往一日鐘忽自鳴

眾異之往視見玉柱雙垂已圓寂矣

以上
忻州

壁峰禪師名寶金世稱金壁峰乾州永壽石氏子母張氏好
善壁峰生六歲依雲寂溫公剃落受具謁如海真公於縉雲
遂大徹悟真授記別且囑曰昔無用和尚謂我云座下出三
虎一彪爾其彪也爾緣在北當詣朔方先是定中見一山有
招者曰此祕魔巖也後北遊五臺道逢蓬頭女子衣敝而五
彩閃爍赤足徐行一黑葵隨行問何所之答曰入山曰入山
何爲答曰一切不爲言訖而沒因就地建靈鷲菴元至正間
詔祈雨入京有驗賜千金逾年復詔入值大雪夜有紅光出
室中賜寂照圓明大禪師號明洪武戊申詔赴京住天界寺
賜紫衣金鉢及御製詩壬子六月集眾言別弟子請偈曰三

藏十二部尙爲故紙吾何言爲怡然坐逝茶毗得舍利無算
建塔北臺文岫山又賜詩旌之壁峰製華嚴字母佛事梵音
清雅盛行於世

其生吉祥中天竺迦維衛國人叻初浮海來禮五頂闕四載
抵臺山駐錫壽安禪林洪武七年上聞其卓行詔住蔣山開
化石城聽法雲集八年春上賜詩曰談笑般若生紅蓮十四
年是疾不能行勅醫療之師附奏欲歸五臺別衆曰今將爲
五臺之行有能從我者乎中一弟子曰某能從師舉足曰汝
無道腳安能從我至午盥沐跣趺而坐舉念珠示弟子擲珠
於地而化

大寶法王葛哩麻烏斯藏人聲聞中國永樂中遣使西土迎
之應召至京封如來大寶法王西天大善自在佛性樂林泉

奏辭遊五臺上賜旌幢繖蓋遣使衛送命太監楊昇重修大顯通寺居之丁亥四月制書褒賜明年師疏別入寂火化無物相傳關吏見法王適西奏上所賜玉珎云又勅楊昇塑像於顯通法堂

釋迦也夫天竺迦維衛國人永樂十二年來遊清涼十一月遣太監侯顯詔至京入大內免拜賜坐頒金印寶誥封大國師後辭還五臺一定七日乃起至宣廟尤加崇禮六年辭歸西域

淨澄禪師西河張氏子誕時適二僧到門曰此兒非常應名清正後出家行至雙城於路逢僧爲落髮卽初命名者尋遊五臺僧清美爲易名徧參悟古宿天順初返清涼代王建普濟寺居之後脫化於寺有山居詩傳世

讓禪師號酌空一號罕峯相傳爲陝右人筮仕長吏棄官雲
遊得佛法於五臺達觀禪師棲獅子窩與憨山海印沙峯輩
五十三人爲淨友戒行精嚴工吟詠萬曆中賜爲紫衣大士
實印禪師初與楚峰玉堂同參臨行大川和尚授以識曰同
去三人載一車後至臺山蛇溝三人同結菴遂成叢林蛇溝
俗名車溝也將入滅說偈辭衆逝

重出

德清字澄印全椒人姓蔡氏年十二辭親入報恩寺與雪浪
恩並事無極法師內江趙文肅公摩其頂曰人天師也德清
以江南習氣軟暖宜入春冰夏雪苦寒不可耐之地以痛自
磨厲飄然北邁參徧融笑岩偕妙峰登棲北臺之龍門老屋
數椽在萬山冰雪中日尋緣溪橫行危坐其上忽然忘身眾
續聞寂身心湛然如大圓鏡大事既徹光明四照慈聖后建

祈儲道場於五臺與妙峰寶主其事光宗應期降誕德清乃
稷東海之半山慈聖遣使再徵不能致布金造寺賜額曰海
印天啟中坐化於曹溪

臘菩薩繫峙人持齋奉佛天啟七年五月大旱菩薩備食渾
源時天上微有雲集語人曰此接吾雲也如不雨而去必大
旱三年可急設一几吾坐其上旁以大甕注水使二人執瓢
灌吾頂待雨足方止既而果大雨菩薩鼻端忽出火自焚空
中現纓絡觀音像里人建廟祀之

以上代州

萬蓬頭嘉靖時居芮城東灘狼窩之佛窰素工談論精風鑑
具與術言吉凶多應婦孺皆稱爲蓬頭師一日告人曰吾將
遠行可泥封吾窰門數日啟視如故他日又使加封固越數
日復啟視空諸所有咸以爲仙去云

解州

可良徽州人嘉靖間住錫聞喜神柏村大雲寺有禪行眉覆
過目面壁冥坐嘗早起遇盜於途呵之盜終日立不能去早
禱雨輒應

淨賢垣曲人明嘉靖時落髮於興國寺閉關養性足迹不履
市廛年六十餘自置一木龕端坐而化

支雲惠聞喜諸生卜居壺關桃源梯三仁廟有膂力捐己資
開山修梯路攀躋登高二十四里飲酒辟穀壽九十八無疾
而終蓋尸解也吳中丞爲立石表之

以上絳州

雲峰觀道士不知姓名萬曆己酉入水簾洞內四日始出登
千百尺石崖如履平地常坐樹杪絕穀不食年許語人曰吾
將遊名山遂去莫知所終

李金仁隰州人修鍊祈真觀不解衣者三年餓遺卻不受移

坐瓦窑坡三年不語亦不履後復移坐洞山上

大柄俗姓張隰州人七歲披剃經懺大藏胥通解壽八十無病坐化

無名僧嘉靖間住大甯縣西道教村土人房芝供應之後火

出鼻中焚其殼芝築龕瘞之隰川

以上隰州

尙青山霍州人居朝陽洞有脫形術常與平陽錢指揮共坐任所索瞑目問輒袖中出之後解脫塑像於太清觀任法素青山弟子也亦尸解人每於他所見之

達連和尙趙城人嘗重修廣勝上下兩寺建霍山琉璃塔平陽高河橋年七十餘端坐逝人傳能前知云

王冲霍州人幼嗜黃老學能避穀遊汾西結菴錠金原汲水以資行人積金鑿井建閣崇禎丙戌遊武當福府強令司其

巷之錢穀一日集諸道流曰流寇將至請交所司時寇在河
北眾莫之信三辭乃脫甫離葦寇猝至閉關北歸辛巳二月
拜訣所知升榻端坐逝是日晡有遇於國柏澗者始知爲羽
化云以上
霍州

右明八十五人

國朝

徐冲善陽曲人初居西山桃源洞遇仙傳丹訣後遷純陽宮
嚴冬不火亦不絮康熙五年坐化年八十四葬東郊立塔焉
潘守器字鼎持湖北人年二十餘出家遇異人授導引內鍊
諸術適晉寓陽曲柏樹園純陽宮去而復來者三閉關靜室
累月不食神彌王康熙己亥白雲觀主王某以守器薦撫臣
送入都乞還山年九十有九卒塑遺蛻於純陽宮之西廊

海金榆次人姓任氏落髮延壽寺得法於天童常刺舌血書華嚴經善大字頗工於詩

了法師榆次人長身大首每出繫巨囊於腰盛糗勸人念佛而啗之人目爲顛僧建彌陀洞求傅徵君作疏自擔鉢禽百許斤爲贄中途見念佛者餓者老而羸者分食之至徵君之門而盡獨枵然二器存焉徵君大喜爲作募緣說手自寫之復贈以詩今其法嗣猶藏此帖

元陽子喬姓榆次人少有道行居大紅山鎮壽寺數十年不出冬不火夜不寐爲常康熙末年正月忽語其徒曰吾歸矣瞑而化

郭桂鳳字雲山太原人初隱於役晚年辭家爲道士擇地作茶菴結緣焉不定道中乏水泉長夏行人病渴爲擇地穿井

二處構半瀛菴於山脊居之暇則作歌自娛且以勸人李學廉中葭亟重之爲作道歌引以行於世

張太春自言太原人年百有餘歲往來定襄及朔州最久居無定所朱顏元髮背能負重其行如飛通經術善導引冬月極寒伏冷窟中數日不出亦不飲食面容自若與衆坐有佞人輒不語定襄孝子石含鑛牛君相得羸疾朔州盧貢生標患腳氣從學其方皆得延壽盧欲贈以錢恐不受臨別納行囊中太春搜得之散途中小兒隨手盡後不知所終或言坐化於都門

李程還榆次人道號三貞子精皇極數且諳金匱方居源洞施霖洞志行高古有卽之者輒因人導之於善元機超解總戎鄂巫所尊禮號曰半仙

麻迷畔太原人本韓氏子自幼祝髮不解誦經惟口吟嘛嘍
畔人遂以呼之雲遊四方無定所朱文正公爲晉藩時遇於
歸化城異之借以歸禿頭童顏搖其頭則齒動有聲冬夏一
衲不知寒暑

僧通境陽曲人年十三聽遑槃卽通文旨遂落髮興福寺戒
律甚嚴及長酷嗜醫術活人甚多榆次賈人某其熟識也一
日趣其速歸曰君家有事當早還某歸未踰月而死人皆異
之乾隆庚戌示寂於寺

常八十無名居會城南十方院爲衆僧服役背僂髮黑衣垢
不澀或日一食或三五日一食人間其年日八十歷數十年
再問無異詞寺僧皆莫詳所自來也羣稱爲常八十有憐其
衣敝者易以新弗受訪以休咎搖手而已後無疾而化

赤足僧不知其名冬夏一單布直綴赤足遊行乾隆壬寅三月忽來石嶺關鳩工鑿石路日役四五十人食餼多寡稱其勞逸不知其費何出也糾視之餘居一石穴閉目禪坐鄉人有饋遺皆不顧終日不食止坐側一鐙常然明年工竣遂不見其石穴在嶺路之西衆爲建祠祀之

佛家鎮不知何許人乾隆末卓錫太谷之北洗村爲人治疾有奇效一布衲十年不易夏圍鑑不熱東臥冰上汗氣蒸蒸間休咎謝弗知而遇與農夫占晴雨卜豐歉則所言應如桴鼓治疾以手撫摩病若失病家延請有至有不至敦迫之則逃矣所居聖母廟中常以季春賽會屆期輒先避去嘉慶五年賽畢命僧徒注水十餘缸於西廊下人不解何意越三日廟不戒於火賴缸水撲滅之一日語其徒明日某時吾當去

詰旦往視則閉目跌坐圓寂矣鼻垂玉柱尺餘

常照清源人幼負剃度爲僧居祁之錢營古寺於醫術有夙
悟精於治瘍劑殺注灼應手奏效晚兼內科求診者踵接以
術名太汾間歷數十年或酬以金帛卽受之否則亦不問及
也而遠近以其名布施者不絕寺中香火日盛未幾化去

尼加雲太原人俗姓范生有佛性年未笄卽落髮居店頭之

觀音寺晚年善治疾不以藥餌微微撫呵頓失所苦

以上太原府

成眞智岳陽人幼爲道士年八十餘順治己亥春語其徒曰

三月朔日吾當坐化命豫造龕具至期泥丸裂孔瞑目而逝

慧文禪師名成祿臨汾人早歲剃度卓錫七佛岩岩中寺明

張恭肅公會讀書其上年久圯毀禪師修復之日跌坐澄心

證道山舊多虎豹皆潛迹至今樵牧往來不絕

僧了化臨汾人從介休龍山和尚遊和尚通禪理工詩文版
依數載頗傳其學既而歸卓錫於姑射之參峪北山寺圓寂
寺中

僧照謙自臨汾來翼坐化於封壁村之朝陽洞將寂時語弟
子曰俟三年宅舍壞然後火我否則昇我至通濟寺以原身
供養勿忘也至期其徒啟龕視皮貌儼然爪甲更長乃如其
言時雍正二年也

僧明珠戒行甚高嘗跣坐道左入定累日不食不餓去翼城
十五里有冶子莊爲東出之衝巖坡橫亘雨行輒墮明珠募
金役工不數日修平之人咸以爲異云

僧廣度號空相太平人幼入善惠寺披剃說法誦經杜門不
出年八十四端坐而化異香竟日不散

圓行和尚名方德太平人早悟三乘法藏兼明醫理爲善惠
寺住持壯遊四方募金重修梵宇又別構屋爲義學歲以所
獲藥貲延師村中貧不能學者皆就傳焉

道士任元禮臨汾人居姑射山之虎頭峯嘗憩路側有黑虎
蹲其旁以杖擊虎輒伏屢遇皆如之又蓄一雞聞經聲則起
舞後尸解著有易象精義一卷

僧照正岳陽人居大覺寺洞曉禪機年九十九示寂後五日
人於霍山頂見之

僧朗智臨汾人居大明村觀音寺法力元妙康熙庚寅七月
誦弟子以某日當寂至期觀者如堵沐浴焚香端坐而化
萬春臨汾圓覺寺僧移居姑射山照天池閉戶誦經常有二
虎蹲踞康熙初復歸寺重修殿宇並刻大乘諸品經

華陰道人臨汾人姓李氏儒家子也順治初常巾服持羽扇
一童負壺盧從遊秦豫間人問之第曰役役紅塵五十三
年矣殆不過爾爾也一時名流多贈以詩不知所終

黃明立臨汾賀洪晉女也小字俏母張氏夢鼓樂迎送菩薩
至其家遂生自幼言笑不苟舉止端莊及笄適張問道敬事
舅姑甚有婦儀忽感疾醫藥不愈發願禮佛日跏趺端坐順
治庚寅正月年二十一矣自言得道中秋之夕復言已受佛
封爲明立菩薩後十三日常有火光菩薩來迎屆期火自七
竅迸出燄高二丈餘有白蛾從火內飛出翩翩直上觀者數
千人空中聞樂聲異香三日不散

以上平陽府

董鐵驢萬泉人身通遁術行步如飛候忽數百里人不之見
俗傳其異蹟甚多後尸解仙去有墓在小淮村之東嶺

蒲州府

月空俗姓黃潞城人少出家參禪義通涅槃大旨多與賢士
大夫遊嘗休夏太行山大旱禱雨徧然肢體一晝夜不飲食
已而大雨霽足募修澤州西郭長隄造岡頭梵剎莊麗成巨
觀一日於普濟殿率緇白數百人設齋忽觀音像從殿中騰
出眾皆輟誦競觀俄而殿崩無一被傷者平日著布衲持佛
頂陀羅尼經遠近病者傾誠拜禱或書神呪或與破縷焚灰
飲之立瘥後卓錫涿州康熙四年自知時當圓寂沐浴畢索
筆大書一偈端坐而逝

大意行腳僧也康熙初止長子之仙師寺貌魁梧持律最嚴
有大力其徒有犯戒者或手持鐘鏝歷其下或捲入簾箔擲
佛殿上轉而下以手接之後開道場於馬村行旅有識之者
若欲語僧張目一視其人斂袂歲餘有少年至跪榻下不言

而泣僧閉目不視其徒勅之僧以如意擊其首少年亦終無言痛哭去僧內著紫衣外被袈裟冬夏坐臥領袈絮爛未嘗或釋將涅槃出涕曰偷生一世耳寺僧葬於佛殿下

立禪師俗姓張名加修平順鄉人幼卽潛心內典年三十餘於杜公嶺爲僧後至五臺山石穴中闕修有虎守門僧共異之迎至寺供養一日忽自起擊鐘聚眾詢之乃云汝輩速往山中視之眾僧趨往見一小僧因取薪爲虎所傷其神照若此後遂不食不語而壁立康熙辛巳

獨幸五臺詢其禪悟以筆對封爲立禪師後忽仆地肉皆消落惟骨存焉眾建塔瘞之

太乙黎城人居遼州青龍洞戒律精嚴十餘年不歷城市涅槃洞中

平和尚名本全居長子石哲鎮得修養法隆冬不近火盛暑
不畏熱僧臘逾八十一日延畫師傳像數日而終似有先知
者

安禪乾隆中居長子方山廟爲火工僧性朴實不設機關汲
水刈薪而外無他事也嘗遇虎阻路叱之曰咄孽畜還不起

虎卽掉頭去年六十餘更衣坐化

以上蹟
安府

際得字松野住平遙超山善詩多佳句尤工行楷一時推重
之

蘭如汾州人明季行腳淮揚頂宣缸募米誓齋十萬八千僧
後住善慶菴十方院順治時示寂入缸三年啟視如生僧衆
建堅固院以供焉

釋性善俗姓孫永甯人祝髮安國寺博覽五經性理諸書能

詩文有儒者風不事參學而根宗了悟順治中示寂

德楷號柏山嗣洞宗三十一世康熙初愛龍山林壑幽勝遂卓錫焉建華嚴禪院

德睿號雪岸楚人德楷法弟著龍山志并詩文行世

釋不傳俗姓胡永甯人康熙中募修金容寺工峻卽坐化殿側其徒就肉身塑像遠近傳播爲異同治中有甯鄉人來遊見像嗤爲僞指剝其味驗焉指忽腫痛不數日竟墮一節道士賀登科石樓人髫齡結廬飛龍山建元天宮造銅殿闕各一在山六十年壽七十有八康熙癸未夏兀坐而化邑人塑像以祀焉

明瑞字相生住超山天性通達戒律明徹人見之卽伏首皈依後創南園昭慶寺住持二十年有語錄

僧隆應介休人能醫和藹不矜雖貧賤所養必盡其心力富
室延療亦不較直所蓄方藥精甚凡金刀鉅創傳之輒愈以

汾州府

三銅道人不知何許人高平諸生成周佐母病喉百藥罔效
一道人過門索蔬具見之曰喉有祟吾爲子手療否且殆矣
擊所持椶扇柄出紅丸七令吞之又彈頂後吐數肉蛾蠕蠕
動旋納之衷中語周佐謝我銅三斤足矣取以付再出失道
人所在殆非世人也遂著三銅道人傳周佐才有義聲畢
振姬與之友

編筐和尚陵川人居縣南郭家川戒行清潔日以編筐爲業
間爲小詩康熙中自刻死期示衆爲禮懺至日梵唱喧闐和
尚合掌冥坐視之已寂

僧具益陽城人號無念道人所畫墨竹丰神瀟灑酒道文與可詩皆散佚又僧眞滄者書法蒼老眞蹟尙多存又金臺寺圓義廣霖兩僧並有詩名

眞武閣老道士乾隆間居陽城東關自言生明天啓中已百二十七歲人初不之信與里中一老翁遇呼其乳名並述翁幼時事云吾前時固至此已隔六十餘載去而復來耳共疑爲仙然道士無他異日惟一食午後卽閉閣獨坐不言其食飲頗兼人但不噉鹽醯居頃之謂人曰吾久欲死而不得死生世亦厭今當並食鹽醯使速就化耳食之數月而卒

以上澤州府

性休號尺木俗姓朱大同人幼補弟子員善詩文工草隸值闖賊之變棄家雲遊戊子始薙髮於粵之龍阮菴從崆峒戒

子傳衣鉢遊漢口遇不退禪師棒喝悟道卓錫於沁州永慶寺歲癸巳正月日早齋畢忽乞十王殿前地於院主院主允之遂趺坐而逝夜半復甦索筆書塔銘曰卜地卜地三上之三乘時乘時二月之二萬彙萌芽造化順理一稼反生吾道乃逆遇雷而鳴逢火出世至二月二日出定沐浴扶至塔前對眾說偈擲杖而化著有銅鞮語錄

魏清泉號得一結菴恒山之夕陽嶺東通悟仙書布衲勝膝處皆穿根皮麥菽異餐同飽菴居數十載遊止未越三百步外康熙時尚在後坐逝今童子皆知魏道士云

常修號潤曾大同人木姓楊棗家雲遊山水後卓錫於都門之愍忠寺善持戒行日誦法華經一部歷四十餘年眾請爲大和尙歲傳戒三壇弟子數千人年七十五端坐說偈而逝

劉一雲恒山九天宮道士古傲類軒轅彌明不識文字談山中典故便於轆轤門外多生藥草服食數十年童顏鶴髮脩然誰垢晚歲人罕接之

成覺楚南戒僧法子也幼業儒性敏慧通習經典善談元理乾隆中雲遊至五臺山道出天鎮止於慈雲古刹時寺僧照福募資修寺復建藏經閣成寬走京師請領龍藏經全部備之四方參徒雲集宗風大振

以上大同府

僧明曜不知何許人亦不詳姓氏康熙間寓榆社北泉寺好談儒學士人多從之遊以主僧禮衰留詩壁間而去詩云布襪青鞵天一方林泉舊夢未能忘閒雲偶住身非繫埜鶴難羈翻自長山被寒侵都改色蘭因秋去不驚霜鎚峰社友如相憶蓮漏無聲夜榻涼

智阜號了空遼州人雲遊訪道頓悟宗旨畫佛象精妙絕倫

刊行於世

以上遼州

普汰號純如沁州靈泉寺僧戒律精嚴兼通文翰順治間遊

郝城

御書佛字賜之知州汪宗魯建樓於寺敬藏之爲世寶圓寂前十日手書素扇十柄徧遺知交展之胥歸家頌也比衆至已逝矣

寶祕別號韜光武鄉韓氏子也初削髮於黎城陽道山聖水寺繼卓錫遼州石佛寺心通三昧升座講經遠方聞風來者甚衆至不能容乃別開叢林助工者萬計後不知所終以上州還陽子姓郭氏名靜中修武人幼時嘗夢驅龍爲行雨狀少長稟家適華陰遇異人授以金丹五雷法由是號還陽嘗往

來晉趙燕齊楚粵間歲旱當事輒走書數千里迎禱雨還陽以掌中雷印據案擊則霹靂應聲大雨如注求者眾第書符付之符甫入境雨隨集其他異蹟甚多後過壽陽太安鎮曰此去西北里許有吾容足處遂定居五峰山之龍泉菴順治初年近百歲顏色如童子一日呼門人具浴浴畢端坐而

逝

平定州

吳立祥定襄人家貧事繼母孝居平喜談因果年五旬得禁口疾醫藥罔效雲遊至江南界遇道人自稱姓回詢所苦出牙戟向喉割之吐肉蛾而愈道士旋失所在立祥年登大耋乃卒復有見之於河上者

圓通大師忻州人俗姓郭少事母以孝聞母沒棄家遊方外冬夏皆跣足言笑似顛人呼爲郭風子間爲人療病隨意撮

藥皆效王制軍秉翰令五臺時以母病延至署中心識其異
訂爲忘年交與之語多元妙遂於易然非其人不與言所言
初不解事後多奇驗州南石嶺關崎嶇僅容一車行旅苦之
乾隆十七年師募數十人鑿治稱其勞逸而給值焉惰者或
備半日師探手取錢適如備數眾驚爲神工竣不知所之嘉
慶年遷化於五臺李姓家

海燕靜樂李氏子少慕道中年薙髮居縣之桃子山三年後
出外雲遊參學有年經禪之暇頗喜吟詠或叩以生鄙字屈
指算之卽知也其後留偈辭世圓寂於河曲某寺

樊光瀛字裕卿定襄縣諸生後雲遊四方改名今是字昨非
號雲鶴居士冠烏角巾持羽扇落魄嗜酒或以酒食遺之食
畢伸紙疾書詩筆字畫皆超絕問以故事應如響談次輒以

世外事亂之後不知所終

牛仙姑定襄郭之美妻家貧事舅姑以孝聞後潛心空寂冬月拾薪聚路旁爲行人禦寒資募金建堂以供觀音工竣鼻

垂玉柱而化

以上忻州

清涼老人阿王老藏俗姓賈順天西山人十歲出家順治癸巳擗齊受戒西天上士諦視曰此中有五臺主人衆皆惘然洎己亥果以兼通番漢選主五臺年七十退居長坐不臥康熙癸亥秋

駕幸臺山

御筆題賜爲清涼老人年八十有七口誦佛號端坐而逝

老藏丹貝蒙古人入衛籍爲趙氏順治庚子掛錫五臺沖澹疎朗解文義工翰墨

駕幸臺山建道場獎賚有加既而入都請改建菩薩大殿遂

卒葬歸山

清源俗姓宋代州人居平遙睡佛寺年六十矣後至百有五

歲示寂

以上代州

曉菴上人不知何處人明末居河曲縣之海潮菴王嘉允之亂上人持杖立寺外賊望見金剛現身懼而退近菴居民賴以得全者甚眾嗣居香山寺嘗云此地羊能馱糧卽富矣蓋謂渾脫可運粟也一日社中倚山蓋屋上人忽至招工匠飲茶甫至寺門山崩屋圯居數年將去俄留之曰師去誰與成此寺者上人曰自有天成又曰馬到功成其後果有僧名天成及馬道者先後興修其寺而奉上人爲開山祖師並建塔塑像焉上人素工書縣中有藏其遺墨者

興儒和尚河曲人雍正中主后佛寺寺中數樓閣皆所募建
善擘寫大書能以酒瓶納腹臍間移時鼎沸年七十餘鼻垂
玉筯端坐而逝

璞山上人始居揚州北來寺後雲遊至河曲止海潮菴時菴
已荒圯上人持戒精嚴刻苦自奉遇人隨事開誘無賢愚皆
敬禮之檀施雲集數年殿宇一新嘗言吾輩出家別無功德
惟以儉養身以善勸世化一善人卽少一惡人圓寂後其徒
如是聖灼靜修皆戒行精嚴守其遺規云

映元上人名達神木人肆力經典以多聞稱精於占卜多奇
中然不輕言也居海潮菴善璞山弟子靜修時與參究宗旨
同治七年回逆北竄上人適里居袈裟跌坐賊問之不答喝
之不動含笑受刀遂遇害其徒海福負骨海潮菴葬璞山塋

中以上係
德州

申通官夏縣人幼出家運城爲道士一日歸家省母道經夏
王城見禹廟傾圮歎曰故都廟貌豈可聽其摧殘遂以興復
力任募資十餘年卒鳩工營建復舊觀大學士馬禔記其事

州解

秦凌霄絳州人父母早逝年二十叔爲授室方合巹逃去學
道於雲邱山繼惡生徒繁鷲屏述州之清溪洞煉丹施藥以
疾來者服符立愈康熙三年重陽日於泉掌甘泉宮端坐而
逝

定珍絳州人住稷山坦然寺苦修四十餘年康熙二十八年
端坐而化塔存號寶峰大師

王常訓聞喜人明季焚修於凝真觀洞曉金丹之術須臾過

臆道貌岸然康熙癸丑大旱縣令沈延之祈雨有驗丙辰復旱禱之亦應年過九旬矍鑠踰昔神識湛然以上絳州

道興字聖國俗姓胡隰州妙樓山石室僧也苦志焚修州人

延主天甯寺南遊金陵六年募造檀佛千六十尊又遊太汾

諸郡歸建層臺高閣為隰偉觀

性善字純天俗姓李隰州人出家汾州安國寺博覽五經性

理諸書工於詩文于清端成龍讀書寺中夢餐鉢羅花性善

檢藏曰此優曇花也清端作詩記之以上隰州

右七十三人又五人附見

山西通志卷一百六十一